

# BOMBEIRO FORESTAL. *A revista do SPDCIF*



**Autonómica**

Verán  
2018  
nº6

## EDITORIAL: ¿INCENDIOS DE SEXTA XERACIÓN, E MEDIO RURAL.....!?

**Diante da ameazas dos "lumes explosivos" da xa cualificada como sexta xeración, a actualización necesaria do Spdcif cara este novo escenario "... non está, nin se lle espera..".**

Agardando polo remate da siesta na Consellería do Medio Rural, aproximámonos ao remate do verán cunha climatoloxía que ate o de agora brindou un verán sen apenas lume. Coñecedoras de que entramos na época da seca onde o mes de Agosto xa fixo o seu traballo no monte e cunha ameaza real

-constatada nestas terras en outubro do ano pasado- dunha nova tipoloxía de lumes moito máis virulentos e perigosos, retraenos á intranquilidade o feito de que a Consellería non fixera sequera o ademán de formar ao dispositivo do Spdcif para afrontar estes novos retos.

Dende a CIG, fixemos nos últimos tempos numerosos avisos mediante escritos, peticións de xuntanzas e mesmo proposta de crear grupos de traballo para analizar e actuar neste marco, anunciando paseniñamente o paso polos lumes de cuarta (o lume chega aos pobos), quinta (multiemergencia, interfaces varias) e agora sexta xeración (lumes explosivos, modifican incluso a meteoroloxía do entorno), cun dispositivo -o SPDCIF- anquilosado aínda nos lumes de terceira xeración (lumes grandes pero no terreo forestal) dos anos noventa.



Temos constancia de que o mes de Outubro do ano pasado meteu moito medo -incluso electoral- no goberno da Xunta, feito que levou a a unha insólita e agardada cobertura de prazas que ronda o 100% -pendentes aínda de que se complte con baixas, vacacións..) que nos congratula e pola cal felicitamos -non foi sen tempo- á Consellería.

Por desgraza isto xa non é suficiente, estamos diante dun escenario moi perigoso que esixe -cando menos tentalo- ir por diante do comportamento dos lumes.

O cambio climático, o novo mapa rural ateigado de abandono e novas construcións nos arredores das cidades, convirten os lumes en polvoríns que ameazan non so aos bosques e os ecosistemas, senón vidas e poboacións enteiras nalgúns casos.

No eido da extinción, cumpre urxentemente un reseteo a nivel formativo , no eido

individual e colectivo. Tórnanse fundamentais neste tempo a interpretación dos lumes, das condicións climáticas, a velocidade de resposta, o traballo en condicións moi tensas con poboación en risco....

So con formación, desa que a Consellería non nos deu nin a primeira , desa que a CIG xa presentou tres proposicións non de lei no parlamento e que incluso o propio Partido Popular recoñece crucial no ditame da Comisión Parlamentaria sobre os lumes do ano pasado; poderemos actuar coa eficacia que precisa este tempo que nos tocou vivir.

## ÍNDICE

Editorial	1	Seguridade nos incendios forestais.	5	O Eucalipto coloniza as terras agararias.	7
Reestruturación de Spdcif.	2	Cadernos técnicos: O manexo da auga(I)	6	Temporalidade no Spdcif.	8
PNL formación.	4	Prevección:		Taboleiro de breves	8
Rotativos emerxencias SPDCIF.	5	Semi máscaras de filtro Combinado.	7		

## REORDEAMOS ENTÓN?



“A CIG aposta por duplicar o número de Brigadas..”.



“Os postos da reordeación deberán ter unha duración mínima de nove meses..”

“Somos a tódolos efectos servizo de emerxencias mal que lle pese aos amig@s das externalizacións e amarilleo sindical en xeral...”

## PROPOSTA DE REORDEACIÓN DO SPDCIF.

### POSICIONAMENTO DA CIG.

**Mediados de Agosto-18, e a reordeación do SPDCIF prantexada por medio Rural e función pública no mes de Abril deambula por algún caixón de San Caetano agardando por algún ano que teña alomenos, eleccións.**

A mediados do mes de Abril, convocadas por Medio Rural e Función Pública, presentouse un borrador de reordeación do Spdcif que incluía varios puntos entre os que destacaban: aumento de tempo- de tres a seis meses- para o persoal propio do reforzo de verán, incorporación das prazas de extinción xestionadas ao día de hoxe por Seaga á Xestión da Xunta, e compromisos de formación para o persoal do SPDCIF.

Ao novo escenario que presentan os lumes no día de hoxe, inseridos xa nas multiemerxencias, resposta a Xunta aínda conmocionada electoralmente pola vaga de lumes de outubro do ano pasado, cunha declaración de intencións máis que borrosa, e iso anunciando, que alomenos neste mes de abril -2018-, tiña o talonario con fondos para reforzar o Spdcif.

Aínda que a proposta presentada dende Función Pública-Medio Rural tiña aspectos máis que positivos, interiorizando en parte a raíz do problema no eido da extinción, quédase demasiado curta ao ser prantexada como unha adaptación do servizo a un tempo que xa pasou. Seguimos camiñando por detrás do problema.

As propostas estacionarias, a posíbel perda de capacidade de reacción diante das incidencias e a perda de calidade dos primeiros ataques, amosannos que a proposta non esta actualizada ao nivel técnico que se deb esixir ao Goberno que afronta o maior número de lumes nas últimas décadas en todo o estado.

A CIG entende que é un bo momento para redimensionar e adaptar o SPDCIF ao cambiante escenario actual, e deixar atrás certos aspectos que foron deseñados para un dispositivo dos anos 90. Porén esta proposta vai encamiñada ao que entendemos debe ser o camiño no curto e medio prazo cara a voltar a ir por diante -e non por detrás como actualmente- dos incendios forestais.

### 1. A CIG APOSTA POR DUPLICAR O NÚMERO DE BRIGADAS.

Non compartimos en absoluto o modelo que propón o borrador presentado pola Administración. O modelo de Brigadas de cinco que se propón no mencionado borrador ofrece un escuro panorama no que a operatividade do servizo se refire. Ao desaparecer Brigadas do territorio -traballando xuntas ocorrería dous días por semana- créanse ocos no territorio que aumentaría o tempo de reacción crucial nos lumes a día de hoxe.

Estamos nun escenario con lumes de cuarta, e quinta xeración, comezando xa a albiscarse a sexta. Nestes casos, debemos tentar reducir o tempo de reacción a un máximo de **vinte minutos**, cun primeiro ataque da máxima calidade para evitar que os lumes se convirtan en incontrolábeis.

A CIG aposta por duplicar o número de Brigadas, sumándolle compoñentes, mantendo así a actual estrutura de brigadas, tendo grupos con maior número de persoal e estando operativas os 365 días do ano. Esta medida evitaría desprazamentos internos de persoal, e tamén non implicaría alterar o acordo de condicións especiais do V Convenio Colectivo, salvo nas quendas horarias.

Esta medida é perfectamente encadrable na proposta orzamentaria que propuxo a Xunta, tomando como referencia o custo medio que suporía o presentado no Borrador inicial.

Si hai orzamento, será entón cuestión de acadar o mellor aproveitamento técnico dos recursos propios e públicos.

Ao duplicar o número de brigadas non existe incremento de custes en vehículos, apeiros, ferramentas, instalacións... xa que son compartidos dende as dúas unidades dunha mesma Brigada. Temos claro dende a CIG, que este é o camiño que debe tomar no medio prazo o Spdcif como eixo Troncal da extinción dos incendios forestais na Galza.

Por suposto, tamén que o persoal das brigadas helitransportadas sexan contratadas integramente pola Xunta de Galicia.

## 2. AMPLIACIÓN DOS TEMPO DE TRABALLO E MAIOR SEGURIDADE XURÍDICA.

Na proposta feita pola Xunta, onde se ofertan ampliar os tempos de traballo ao persoal propio do reforzo de alto risco e a creación de cincocentas novas prazas -a día de hoxe en Seaga-, ampliacións que rematarían progresivamente nunha temporalidade de seis meses. Crea isto unha nova temporalidade no precariado e ao mesmo tempo na alegalidade, xa que nin o V.C.C.U. nin a RPT recolle tales temporalidades, coas xa recoñecidas fraudes de lei en numerosas sentenzas.

A CIG considera unha proposta errada, alegal e pouco efectiva sobre o terreo.

Máis que demostrada está a desaparición da estacionalidade nos incendios forestais, onde xa non ten sentido focalizar en so tres meses de verán o alto risco, coñecedores dos últimos meses de Ooubro que nos precederon.

A maiores, coa entrada en vigor da nova lei de protección civil, onde estamos integrados a tódolos efectos como corpos de emerxencias, dende a CIG pulamos por unha utilización racional dun servizo creado e enfocado cunha distribución no territorio óptima para racionalizar os recursos con estas novas tarefas.

Consideramos que é un erro crear a día de hoxe novas temporalidades que a maiores non teñen ningún tipo de amparo xurídico.

Esiximos que **tódolos postos de traballo que se creen ou se lles amplie a temporalidade deben ter un mínimo de nove meses de duración tale como recolle o V.C.C.U.**

Por legalidade e operatividade non podemos permitir menos.

Por dignidade laboral, profesional, e por uns salarios minimamente dignos no cómputo anual, será tamén este o noso obxectivo cara o curto e medio prazo.

Tomando como referencia os custes medios do borrador presentado pola Xunta, esta proposta que defede a CIG é tamén perfecta e completamente

asumíbel, feito que nos reforza na defensa deste dispositivo máis forte en número e asentamento no territorio.

## 3. FORMACIÓN E PROFESIONALIZACIÓN DO DISPOSITIVO.

Este apartado que pasa case desparcibido no borrador, é para a CIG unha das pedras angulares no que a adaptación do Spdcif a nova tipoloxía de lumesa se refire. Consideramos inconcebíbel que apenas se lle preste atención dende esta borrador. Temos claro que logo da consecución da categoría profesional 5932 Bombeir@ Forestal toca percorrer tódolos camiños que esta conquista nos brindou. Esta categoría encadrounos nunha profesión regrada, pertencente a unha familia profesional con tarefas comúns a a desenrollar, en definitiva un encadre con maior e máis certeza profesionalización e seguridade xurídica.

A pertenza a familia profesional de seguridade e medio ambiente, reforzada pola entrada en vigor no 2015 da nova lei de protección civil, situou ao SPDCIF nun marco de traballo e cunhas necesidades formativas moito máis amplas do que coñeciamos ate agora. Somos a tódolos efectos servizo de emerxencias mal que lle pese aos amig@s das externalizacións e amarilleo sindical en xeral.

É imprescindíbel logo, adaptar aos Bombeir@s forestais ao nivel formativo que lle corresponde.

Por suposto, o novo escenario onde os lumes se tornan en

multiemerxencias, cos lumes de interface á cabeza, son outra necesidade acuciante que precisa como auga de maio reseteo e actualización a nivel formativo de traballadoras e dirixentes do Spdcif.

Por todo iso, a CIG leva presentadas peticións por escrito na propia Consellería, e tamén no parlamento galego mediante a presentación de dúas Proposicións non de lei -PNL-, tendo como consecuencia a convocatoria das unidades de competencia de operacións e extinción de incendios.

Completamos a petición solicitando que os modulos formativos sexan impartidos ao persoal do SPDCIF.

A formación que demandamos dende a CIG ven recollida no decreto 624/2013 de 2 de Agosto, onde no anexo III desgrana os contidos formativos que deben ter @s Bombeir@s Forestais.

O novo escenario ao que nos enfrontamos é por necesidade o marco ideal para que se desenrole toda a formación que lle corresponde por lei @s Bombeir@s forestais.



# A CIG REXISTROU PNL NO PARLAMENTO PARA COMPLETAR O CICLO FORMATIVO INICIADO NAS UNIDADES DE COMPETENCIA

## **A CIG voltou ao parlamento para completar o ciclo formativo ao persoal do Spdcif.**

Así unha vez acadada a convocatoria das unidades de competencia de operacións de extinción de incendios, centrámonos en que os contidos formativos que a compoñen sexan impartidos ao persoal do Spdcif tal e como lle corresponde pola actual e recentemente conseguida categoría profesional.

A primeira PNL que se presentou e que precede a esta esta, foi aprobada en comisión parlamentar coa unanimidade dos grupos, e desembocou na convocatoria dos procesos de certificación profesional (dous ao tempo de redactar esta Pnl) das catro unidades de competencia ligadas á profesión de bombeiro forestal e da familia profesional seguridade e medio ambiente.

Unha vez recoñecida a categoría profesional, e encadrados na familia de seguridade e medio ambiente tal e como relatamos anteriormente, a formación inherente ao mercado pola propia lei debe chegar de inmediato para non incumprir o curricularmente establecido polos decretos correspondentes.

A maiores -do curricular- consideramos imprescindible esta formación diante da necesidade tanto no eido do nivel técnico, coa afronta que supoñen o novo tipo de lumes, como para rematar o proceso legalmente establecido pola lei na formación correspondente a nova categoría profesional-.

A Xunta de Galicia conta coa Academia Galega de Seguridade Pública (AGASP), centro especializado neste tipo de formación para os servizos públicos de emerxencias, polo que entendemos que a proposta encaixa perfectamente dentro da infraestrutura pública de formación.

Os módulos formativos correspondentes e correlativos coas unidades de competencia asignadas á cualificación profesional "operacións de vixilancia e extinción e apoio a continxencias do medio natural e rural", son os que desglosamos a continuación:

- **MF1964\_2**; labores de vixilancia e detección de incendios forestais, mantementos de infraestruturas e información a poboación. (110 horas).
- **MF1965\_2**; extinción de incendios forestais, o modulo formativo. (150 horas).
- **MF1966\_2**; continxencias no medio natural e rural (100 horas).
- **MF0272\_2**; primeiros auxilios. (40 horas).
- **MP0491** Módulos de prácticas profesionais non laborais de operacións de vixilancia e extinción de

incendios forestais e apoio a continxencias no medio natural e rural.(80 horas)

### **MF1964 2: Labores de vixilancia e detección de incendios forestais, mantemento de infraestruturas asociadas e información á poboación (110 horas).**

•**UF2360** (Transversal): Topografía e Comunicazóns. Coñecementos básicos (30 horas).

•**UF2361**: Operacións básicas de vixilancia e detección de incendios forestais. Revisión e Mantemento de infraestruturas de prevención e instalacións de extinción e divulgación á poboación de medidas preventivas (50 horas).

•**UF2362** (Transversal): Actuacións para o control de conatos en ataque inicial (30 horas).

### **MF1965 2: Extinción de incendios forestais (150 horas).**

• **UF2362** (Transversal): Actuacións para o control de conatos en ataque inicial (30 horas).

•**UF2363**: Actuacións para o control de incendios en ataque ampliado. Incendios forestais de comportamento extremo (70 horas).

• **UF2364**: Actuacións para o control de incendios con apoio de medios aéreos e emprego de lume técnico (50 horas).

### **MF1966 2: Continxencias no medio natural e rural (100 horas).**

•**UF2365** (Transversal): Intervención en continxencias causadas por accidentes de tráfico, accidentes de mercadorías perigosas e incendios en edificacións no medio rural e natural (50 horas).

•**UF2349**(Transversal): Actuación en sucesos por fenómenos naturais : vendavais, inundacións e riadas, afundimentos por efecto de terremoto ou correntes de terreo e outros.

### **MF0272 2 (Transversal): Primeiros auxilios (40 horas).**

**MP0491**: Módulo de prácticas profesionais non laborais de operacións de vixilancia e extinción de incendios forestais e apoio a continxencias no medio natural e rural (80 horas).

Solicitouse á mesa do Parlamento que:

1. Se incluíra no programa da academia galega de seguridade pública – ou centro que a administración considere- esta formación necesaria e obrigatoria para tód@l@s [Bombeir@s](mailto:Bombeir@s) Forestais que desempeñan as funcións en Galicia.

2. Que se forme a [est@s](mailto:est@s) [traballador@s](mailto:traballador@s) nos módulos formativos anteriormente mencionados.

## ROTATIVOS DE MERXENCIAS PARA OS VEHÍCULOS DO SPDCIF

**A CIG solicitou a incorporación dos rotativos de emerxencias aos vehículos do Spdcif.**

Dende o día 15 de Xuño de 2015, o Servizo de prevención i extinción de incendios da Xunta de Galicia - SPDCIF-, forma parte a tódolos efectos dos servizos de emerxencias, tal e como recolle no art.17 a lei nacional de protección Civil que entrou en vigor nesa data.

Como servizo de emerxencias fomos dotados por sgunda vez consecutiva - ano 2018- por vehículos pick-up que contan con bomba para extinción entre outros equipamentos.

O pasado 7 de Xuño de 2017, o Ministerio do Interior emitiu unha instrucción 17/TV-97, sobre circulación de vehículos Pick-Up baseada na directiva europea 2007/46/CE, onde se indica que os vehículos Pick Up que non superen os 3500 quilos e os dous metros de altura, rexerenase polas normativas de circulación dos turismos.

Entendemos que esta directiva afectou directamente aos vehículos pick up- ao superar os dous metros xa non se rexen pola normativa de turismos, senón pola de camións, 90 km/hora de vel. máxima- polo cal nesas datas xa nos diriximos á subdirección xeral de incendios para que actuara, xa que **afectaba de forma clara e manifesta ao tempo de reacción, clave na extinción temperá dos lumes.**

Tamén se deu traslado deste problema aos comités de seguridade.

Certo é que os vehículos entregados melloraron considerablemente as prestacións, pero **entregáronse seis meses despois de que se publicara a instrucción do inisterio do inetrior**, feito que debería ter provocado a reacción da **Secretaría Xeral técnica, que parece neste senso descoñecer a normativa aplicable aos vehículos que entrega.**

Certo é que xa bastantes rockambolescas foron as prórrogas no límite da legalidade contractual que se fixeron aos vehículos anteriores, como para pararse a ler estas novas instrucións.

Por certo , aos escritos presentados pola CiG solicitando os contratos

desas ampliacións, dirixidos incluso ao portal de transparencia da Xunta, esta Central sindical recibiu silencio administrativo.

Por sorte, desta vez, como xa ocorreu en varias veces nos últimos tempos, acude a salvarnos da desfeita organizativa na que se converteu o Spdcif, o feito de que **formamos parte dos dispositivos de emerxencias** - pertenza que non se concreta a modo de incorporación de definitiva, xa que a Xunta se empeña teimudamente en en retrasala.

No BOE de 31 de Xullo, saen publicadas as modificacións do reglamento xeral de vehículos, onde no seu anexo XI recolle que a sinal luminosa V-1 de vehículo prioritario, para servizos de policía, **extinción de incendios...será azul** para todos os vehículos de emerxencias.

Con esta medida queda homexeneizada a iluminación destes dispositivos cos países da contorna.



Dende a Cig, esiximos á Consellería de Medio Rural, que aclare dunha vez por todas como aplicar estas normas dentro do Spdcif, onde por un lado deben executar de xeito inmediato a colocación de luces prioritarias que axudará a reducir os tempos de reacción, pero por outro lado debe aclarar a velocidade dos vehículos cando non se estea facendo uso dun servizo explícito de emerxencia.

## SEGURIDADE NOS INCENDIOS FORESTAIS.

*92 traballador@s falecidos nos últimos 20 anos (ate 2017). O triple que no resto de sectores no estado.*

Si o encadre se fai máis estricto, nos meses de verán e horas de intervención, estamos diante dunha das profesións con maior perigosidade do estado.

Arredor de 38.000 traballadoras enfrontan no estado nas tempadas de máximo risco o combate contra as lapas.

Dentro das casuísticas máis comúns; vexetación sen queimar entre o lume, non ter visión directa do lume e descoñecer a súa evolución, explosión do lume...

Os estudos consultados, fan unha relación directa entre a estacionalidade laboral e os accidentes.

Ao contratar a moit@s traballadoras exclusivamente par un período curto do ano, obriga a interiorizar -no mellor dos casos- coñecementos, normas , protocolos, técnicas de extinción....

A eficacia e seguridade precisan de planificación, zonificacións prioritarias, coñecementos espécíficos de maquinaria, comunicacións...

A formación continuada, máis necesaria que nunca, no camiño de capitalizar a experiencia como o maior valor engadido, é imposible de acadar con esta estacionalidade e tendo en conta que o tempo de traballo coincide co de maior actividade.

O aumento do tempo de traballo é asumir a formación como pedra angular cara a mellora dos resultados e por suposto, como mellor ferramenta contra da siniestralidade laboral .

En definitiva, maior profesionalización **contra unha estacionalidade que "MATA".**

# CADERNOS TÉCNICOS

## O MANEXO DA AUGA NOS INCENDIOS FORESTAIS(I)

### A OPTIMIZACIÓN DESTA.

***Comezamos unha serie de artigos sobre o manexo eficiente da auga dentro das labores de extinción e control dos incendios forestais.***

***Do seu manexo dependerá en boa parte o éxito nas operacións de extinción.***

A auga é probablemente o elemento máis eficaz para acadar o control dos lumes forestais, tanto por si soa como con aditivos incorporados. A principal característica da auga, que é base troncal da súa capacidade de extinción é o elevado calor específico que ten (fai falta unha caloría para elevar un grado centígrado un gramo de auga). Isto supón que a cantidade de calor necesario para elevar a temperatura da auga ou forzar o seu cambio de estado, é calor que non se emprega para manter o proceso de combustión (reacción química exotérmica).

Polo tanto, a principal característica da auga con respecto á extinción é producir un efecto de enfriamento, baseado fundamentalmente no cambio de estado, de líquido a gaseoso, da auga.



Pero este proceso de enfriamento ten así mesmo efectos engadidos que actúa sinerxicamente como é que o enfriamento producido ralentiza de forma significativa a reacción en cadea non inhibida na base da lapa, a este efecto chamáselle inhibición.

Ademáis a auga produce un considerábel efecto de sofocación (loxicamente máis importante en lumes de interior) xa que se reduce a cantidade de osíxeno por un efecto de dilución, debido á conversión da auga en vapor de auga. Un exemplo claro é que 1 litro de auga a unha temperatura entre 4 e 20 ° centígrados se convirte en 1700 litros de vapor chegando ós 100 grados C, de chegar a 400 °C convertiríase en 4900 litros de vapor. A auga alcanza a súa máxima densidade a 3,8°C , 1 litro/1 quilo.

Fan falta 540 calorías para elevar un gramo de auga de 20 °C a 100 °C.

Outro dato importante é que a auga tarda catro veces máis en enfriarse e quentarse que a masa de aire.

Ademáis a auga ten unha tensión superficial moi elevada debido fundamentalmente ás pontes de hidróxeno, aínda que a tensión superficial diminúe cando se incrementa a temperatura.

Outra característica moi útil da auga é que é case transparente para ao espectro de luz visíbel, pero absorbe a lonxitude de onda infravermella (principal fonte de transmisión do calor por radiación).

Estes datos sobre a auga vannos permitir entender a técnica adecuada de aplicación en incendio en cada momento.

As principais técnicas de aplicación que abrodaremos en posteriores números son:

**Chorro compacto  
Pulverización múltiple.  
Nebulización.**

**É imprescindíbel que o persoal do SPDCIF reciba formación teórica e práctica XA!!!**

# PREVENCIÓN E DEMÁIS

## MASCARILLAS CON FILTRO COMBINADO PARA VAPORES ORGÁNICOS, AMONIACO...

A protección respiratoria ten centrado boa parte do traballo da CIG en canto á mellora da protección [d@s](#) traballadoras en primeira liña de extinción dos últimos tempos.

A través de numerosos escritos levamos tempo esixindo á Xunta de Galicia necesidade de mellorar a protección respiratoria [d@s traballador@s](#).

Entendemos que a protección actual baseada nun simple filtro de partículas, aerosois e neblinas é insuficiente para a protección [d@s traballador@s](#), a cal ven regulada pola lei 31/1995, en particular a protección contra o risco relacionadas co real decreto 374/2001.

Pois ben, dende a CIG levamos tempo pedindo a introdución dunha semi máscara de calidade e protección axeitadas para os riscos respiratorios aos que están expostos no desenrolo das súas funcións @s Bombeir@s forestais, neste caso, da Xunta de Galicia.

Tivemos coñecemento nas últimas datas dun estudo realizado pola Dirección Xeral de protección da cidadanía da Comunidade de Madrid, sobre a exposición de contaminantes químicos presentes no ámbito dun incendio forestal.

Este estudo desenrolouse baixo unhas medidas concretas tanto de tamaño (400 m<sup>2</sup>) como de tipo de vexetación moi concreto (piñeiro, sobreira, jara, pasto)cunha ventilación abundante, un escenario case idílico se o comparamos coas condicións extremas que se poden dar nun incendio forestal tipo que se da en Galicia.

Isto da un resultado que avala a necesidade de protección respiratoria que dende a CIG levamos tempo esixindo.

Este informe toma como gases de referencia da análise – Formaldehidos, Acroleínas e Monóxido de Carbono, deixando outros gases presentes que poden ser letais - baseados en numerosos estudos científicos determinados – como o Dióxido de Carbono, o gas mais frecuente nos incendios forestais. Este gas ten unha característica perigosa como é que incrementa de forma moi importante o ritmo cardíaco e o respiratorio, contribuíndo á inhalación máis frecuente de gases máis perigosos, como a Acroleína, Formaldehina e Monóxido de Carbono, Tamén a inhalación de Monóxido de Carbono, de aire quente saturado de humidade, que con temperaturas preto dos 60 ° C e con saturacións próximas ao 100%, poden producir graves queimaduras nas vías aéreas.

Apórtanos datos interesantes este estudo, máis teremos en conta que é unha análise insuficiente en canto aos riscos derivados dun gran incendio forestal, xa que so analiza parte dos gases, e se realizou nunhas condicións con moi pouca carga de combustible de escasos 400 m<sup>2</sup>.

Este estudo indícanos que @s bombeir@s forestais , cando actúan en posicións (e condicións) desfavorábeis, que soen ser as máis frecuentes sobre todo en tamaño de incendios importantes e en labores supéranse ate cinco veces os valores limites ambientais de exposición (VLA-EC) en Acroleína e Formaldehido en valores limites ambientais diarios ( VLA-ED), supéranse máis de cinco veces o valor límite diario en exposicións favorábeis i en posicións desfavorábeis ate o 5,25 a exposición de Monóxido de Carbono.Lembramos que sempre falamos dun ensaio dun tamaño escaso 400 m<sup>2</sup>.

Como indica o art. 5 do R.D 665/97 o empresario garantirá que o nivel de exposición dos traballadores ao risco sexa tan baixo como sexa tecnicamente posíbel.

Avalan esta nosa solicitude o CLIF, o citado estudo da Comunidade de Madrid, e o propio plan de prevención e riscos do Spdcif.

**É imprescindible que se equipe dende xa ao persoal de extinción con semi máscaras con filtro combinado tipo FFP2, protección media, e se aplica a semi máscaras con filtros ABEKP2/3 (vapores orgánicos, gases e vapores ácidos, amoniaco e partículas.**

## O EUCALIPTO OCUPA XA MÁIS DE 30.000 HAS. DE SOLO AGRARIO NA GALIZA.

A omnipresencia do Eucalipto é cada vez máis palpábel polo país.

A colonización de terras, atopa no seu camiño a oposición de cada vez máis colectivos sociais, ambientalistas, e mesmo organismos dependentes do mesmo goberno como é o comité científico de Medio Ambiente que o cualifica de "especie invasora".

Diante deste escenario, o goberno da Xunta abre a billa para que poida haber no territorio 38.000 Has. mais ate o 2038.

No periodo que vai entre entre o ano 2001 e o 2017 a superficie do eucalipto aumentou nun 65%e ronda arredor de hoxe as 310.000 Has, cando no Plan forestal de Galiza de 1992 estaba prevista que a superficie no 2023 fose de 245.000 has.

Tomando os datos aportados por organizacións como Unións Agrarias, hai máis de 30.000 Has. de eucaliptos en terreos que teñen cualificación de terras agrarias.

O sumatorio destas dúas accións, deriva en que a maior perda da superficie agraria, maior colonización do eucalipto, polo cal o empobrecemento do terreo ven substituído pola colonización da especie que xunto co piñeiro é a mellor aliada na propagación do lume. Segundo datos do INE, no período que vai de 2013 ao 2016, Galiza perdeu 36.000 Has. de terreo agrario, o que representa máis dun 5% de superficie agraria total, e a metade de toda a que se perdeu nese periodo no estado.

Dende o 1985 e até hoxe ha uns anos na Galiza perdéronse 265.000 Has. de superficie agraria útil.

Queda a taxa de superficie útil por debaixo do 25%, o que sitúa a media á cola da Unión Europea



## TAXA DE TEMPORALIDADE NO SPDCIF " fora de control".

O 7 de de Marzo de 2016, o DOG publicaba unha pírrica oferta de emprego correspondente ao ano 2016. Dentro desta oferta de emprego aparecen prazas correspondentes ao Spdcif, que logo de varios anos de seca - do ultimo procedemento xa van 15 anos- xeraron certas expectativas dentro dun colectivo , que ao igual do resto de laborais da Xunta, "atesoura" arredor dun 50% de temporalidade.

Veiu aderezado esta infame oferta, coa publicación uns meses despois -na mañá do 24 de Maio do mesmo ano- dun acordo que recortaba un pouquiño mais o Convenio colectivo, encadrada nunha cortina de fume apaludiada - e asinada- polas outras tres OOSS torticeiramente á par de recortar, prometia duplicar prazas.

A día de hoxe, 31 de Agsoto de 2018, está mais preto de caducar dita oferta que de calquer outra posibilidade.

Neste tempo, non parou de enzarzarse a propia Consellería en promesas inseridas definitivamente na mentira compulsiva.

Unha "obriga" de funcionarizar posterior a esta oferta , promesas de restructuración , que se bloquean unhas a outras, sitúan a nosa Consellería no camiño das "fake news".

Esta Consellería precisa logo, "UN LAXANTE".

Dende a Cig reiteramos de novo, por activa e pasiva, a necesidade de acometer unha verdadeira OPE que remate coa temporalidade extrema neste Servizo - aderezada agora coas sentenzas de indefinición-, nos parámetros recollidos no convenio, cun concurso oposición como laborais, anterior a calquer dos outros procesos grandilocuentes de ocorrencia en San Caetano. Non estaría mal, tampouco, ter unha folia de ruta que dea un mínimo de seriedade ao proxecto que no medio prazo debería afrontar o Spdcif.

A temporalidade no día de hoxe, asfixia tódolos procesos de cobertura de persoal, froito dunha pesima xestión que nos ultimos anos tomou "camiño a ningures".



**Confederación Intersindical Galega**



## TABOLEIRO DE BREVES

### **Persoal de reforzo alto risco.**

Logo de prometer- so na prensa- a ampliación do periodo de traballo deste colectivo de tres a a catro meses, seguimos a día de hoxe- 29 de Agosto- a espera de noticias, logo de solicitar aclaración disto por escrito en varias ocasións.

Tildamos cando menos de pouco respetuosa para c@s traballador@s a actitude da Consellería cun colectivo ao que ano pasado cesou e renovou en tres días a golpe de teléfono.

### **Bases de helicópteros.**

A Cig ten esixido nos ultimos tempos a Consellería que volte a contratar ao persoal de Brigadas helitransportadas polas listas do decreto.

Ao mesmo tempo, e mentres isto non acontece, temos presentado varias queixas, reclamacións e denuncias sobre varios incumprimentos das concesionarias.

Contacta con nós:

[xunta@cigadmon.gal](mailto:xunta@cigadmon.gal) / [autonomica.cigadmon.gal](http://autonomica.cigadmon.gal)

988 233 850 / 698 153 223



@CIGAautonomicaOU



[facebook.com/CIG.Autonomica.Ourense](https://www.facebook.com/CIG.Autonomica.Ourense)